



**NOGOMETNI SAVEZ FEDERACIJE BOSNE I HERCEGOVINE**

**PROPozICIJE**  
**takmičenja m:tel Prve lige Federacije BiH**  
**za takmičarsku sezonu 2021/2022**

Sarajevo: juli/srpanj 2021.

Broj: 1467/21  
Sarajevo: 07.07.2021.

Izvršni odbor Nogometnog saveza Federacije BiH na osnovu člana 32. Statuta NS Federacije BiH, na 6. sjednici održanoj 07.07.2021. godine u Sarajevu, a na prijedlog Komisije za takmičenje NS FBiH, donio je s l j e d e ć e:

**PROPOZICIJE**  
**takmičenja m:tel Prve lige Federacije BiH**  
**za takmičarsku sezonu 2021/2022**

---

**I - OPŠTE ODREDBE**

---

**Član 1.**

1.01. Ovim Propozicijama utvrđuje se način organiziranja i provođenja takmičenja u m:tel Prvoj ligi Federacije BiH u takmičarskoj 2021/2022 godini.

---

**II - UČESNICI TAKMIČENJA**

---

**Član 2.**

2.01. U takmičenju za prvenstvo m:tel Prve lige Federacije Bosne i Hercegovine za takmičarsku 2021/2022 godinu u m:tel Prvoj ligi Federacije BiH sudjeluje 16 (šesnaest) klubova sa prostora Federacije BiH.

---

**III – RUKOVOĐENJE TAKMIČENJEM**

---

**Član 3.**

3.01. Takmičenjem m:tel Prve lige Federacije BiH rukovodi Izvršni odbor NS FBiH putem Komisije za takmičenje NS FBiH i ostalih komisija Izvršnog odbora i pravnih tijela NS FBiH.

**Član 4.**

4.01. Organi nadležni za provođenje takmičenja m:tel Prve lige Federacije BiH su:

- a) Komisija za takmičenje NS FBiH – rukovodi takmičenjem, registruje utakmice, donosi prvostepene odluke, rješava žalbe u prvom stepenu, rješava sva pitanja iz takmičarskog dijela, određuje delegate za utakmice, vrši analizu obavljanja delegatske dužnosti i drugo;
- b) Komisija za suce i suđenje NS FBiH – rješava žalbe na suđenje, vrši analizu suđenja i rada posmatrača suđenja, određuje suce i posmatrače suđenja na utakmice i drugo;
- c) Komisija za bezbjednost NS FBiH – vrši kontrolu bezbjednosti na utakmicama m:tel Prve lige FBiH, predlaže utakmice visokog rizika, predlaže mjere sprječavanja negativnih pojava na stadionima i drugo;
- d) Disciplinska komisija NS FBiH – donosi prvostepene disciplinske odluke;
- e) Apelaciona komisija NS FBiH – drugostepeni organ koji donosi odluke po žalbama na prvostepene odluke iz takmičarskog i disciplinskog dijela;
- f) Prvostepena komisija za licenciranje klubova NS FBiH – odlučuje da li aplikantu može izdati licencu u skladu sa odredbama Pravilnika o licenciranju klubova m:tel Prve lige FBiH i u roku određenom za predaju zahtjeva;

- g) Apelaciona (drugostepena) komisija za licenciranje klubova NS FBiH – odlučuje o žalbama aplikanta za licencu te donosi konačnu i obavezujuću odluku o tome da li može izdati licencu;
  - h) Druge komisije Izvršnog odbora NS FBiH.
- 4.02. Ostale nadležnosti i zadaci komisija i pravnih tijela NS Federacije BiH propisani su Pravilnikom o radu Komisija Izvršnog odbora, pravnih tijela i takmičarskih organa NS FBiH, Pravilnikom o licenciranju klubova m:tel Prve lige NS FBiH, te ostalim pravilnicima i odlukama Izvršnog odbora NS FBiH i NS/FS BiH.

---

#### IV - USLOVI ZA UČESTVOVANJE U TAKMIČENJU

---

##### **Član 5.**

- 5.01 Za učestvovanje u takmičenju m:tel Prve lige Federacije BiH klubovi su obavezni ispunjavati uslove iz Pravilnika o licenciranju klubova m:tel Prve lige Federacije BiH.
- 5.02. Za sudjelovanje u takmičenju m:tel Prve lige Federacije BiH, pored ostalih, klubovi moraju ispunjavati slijedeće uvjete:
- 5.03. **IGRALIŠTA:**
- a. Da posjeduju odgovarajuće igralište sa kvalitetnom travnatom podlogom za igru, sa prirodnom podlogom ili umjetnom podlogom sa potrebnim certifikatom i dozvolom Nogometnog saveza Federacije BiH, dimenzija 100-110 metara dužine i 64-75 metara širine. Teren mora biti zatravljen cijelom površinom i potpuno ravan da bi se omogućilo normalno kretanje.
  - b. Teren za igru mora biti odvojen od gledališta žičanom (zatvorenim) ogradom punog profila i odgovarajućeg kvaliteta. Ograda mora biti udaljena najmanje dva (2) metra od uzdužne linije igrališta i tri (3) metra od poprečne linije iza vrata (golova) u visini kaznenog prostora. Minimalna visina ograde je 120 cm, računajući sa nivoa tribina.
  - c. Igralište mora posjedovati zaštitne kabine odgovarajućeg kvaliteta za rezervne igrače i stručno vodstvo ekipa za najmanje 13 osoba (13 fiksiranih sjedalica) kao i odvojenu kabinu za delegata utakmice, a sve zaštićeno od kiše i vjetra. Kabine se postavljaju na uzdužnoj strani igrališta, propisno udaljene od terena za igru, odnosno uzdužne linije (dva do tri metra).
  - d. Na stadionu moraju postojati svlačionice za obje ekipe i posebna svlačionica za suce. Sve svlačionice trebaju imati mokre čvorove- kupatila sa toplom vodom, za igrače sa tri (3) tuš ruže, a kod sudaca jedna (1) tuš ruža. Svaka svlačionica (sudijska posebno) treba imati zaseban WC.
  - e. Stadionu gdje se igraju utakmice m:tel Prve lige Federacije BiH moraju imati tribine sa najmanje 1.500 mjesta za sjedenje, a od toga najmanje 1.000 individualnih sjedišta (sjedalica). Kapacitet može biti ostvaren putem jedne ili više tribina koje su djeljive na zasebne sektore.  
Klubovi koji imaju 1.000 individualnih sjedalica smatra se da ispunjavaju uvjete iz Propozicija takmičenja uz obavezu izgradnje dodatnog tribinskog prostora sa najmanje 500 mjesta za stajanje.
  - f. Izlazak na teren i povratak igrača u svlačionicu, stručnih rukovodstava ekipa, delegata i sudaca, mora biti osiguran i odvojen od gledatelja. Prolaz od svlačionica do terena za

igru mora biti fizički odvojen od gledatelja i mehanički zaštićen (tunel za izlazak igrača i službenih osoba od svlačionica do terena).

- g. Na stadionu treba biti posebna prostorija za sastavljanje zapisnika. Na stadionima klubova i za utakmice m:tel Prve lige FBiH u službenom prostoru za zapisnik, klub domaćin treba da obezbijedi:
  - ispravan kompjuter sa štampačem,
  - ispravnu internet konekciju za potrebe COMET informacionog sistema,
  - ispravnu telefonsku liniju i telefaks.Neispunjavanje uvjeta ove tačke sa sobom povlači disciplinske sankcije.
- h. Klub organizator dužan je obezbijediti jednu kontrolnu sobu za hitno okupljanje krizne grupe na utakmici. Ova kontrolna soba služi za hitno okupljanje: delegata, službenih predstavnika klubova, komesara za bezbjednost domaćina i predstavnika policije u slučaju krizne situacije.
- i. U slučaju krizne situacije formirat će se krizni štab sa delegatom, komesarom za bezbjednost, pripadnicima MUP-a te službenim predstavnicima obje ekipe, koji će ocijeniti ima li elemenata za nastavak ili prekid date utakmice.
- j. Uz teren ili na tribinama, za snimatelja utakmice mora biti izrađeno uzvišeno i potpuno zaštićeno od vremenskih neprilika i publike mjesto minimalne visine tri (3) metra, na poziciji središnje crte igrališta kako bi se mogao pokriti cijeli teren za snimanje.
- k. Snimanje utakmica m:tel Prve lige FBiH vršit će neovisna TV agencija koju bira IO NS FBiH. Snimateljima TV agencije klub domaćin je obavezan omogućiti sve uslove za nesmetano i slobodno snimanje, pod prijetnjom disciplinskih sankcija.
- l. Igralište mora biti primljeno od nadležne Komisije NS FBiH za prijem igrališta i registrirano za odigravanje prvenstvenih utakmica. Zapisnik o prijemu-registraciji igrališta treba da je javno istaknut u prostoriji gdje se sačinjava zapisnik utakmice.
- m. Klubovi koji ne ispunjavaju uvjete iz ovog člana, pod „igralište“ ovih Propozicija, mogu u cilju provođenja takmičenja uzeti pod zakup igralište nekog drugog kluba ili vlasnika potpisivanjem sporazuma o korištenju igrališta, s tim da isti ispunjava uvjete iz člana 5.03. pod „igralište“ ovih Propozicija.

#### 5.04. **OSTALI UVJETI:**

- a. Klub mora ispunjavati uvjete iz Normativa minimuma stručno-pedagoškog rada za mlađe kategorije nogometaša u osnovnim nogometnim organizacijama;
- b. Klub m:tel Prve lige FBiH treba imati organiziranu nogometnu aktivnost za selekcije početnika (U-11), pretpionira (U-13), pionira (U-15), kadeta (U-17) i juniora (U-19).
- c. U cijelom toku takmičarske sezone u stalnim takmičenjima klub m:tel Prve lige FBiH mora imati uključene najmanje četiri omladinske selekcije što se odnosi na pretpionire (U-13), pionire (U-15), kadete (U-17) i juniore (U-19) u takmičenjima, od kojih juniori i kadeti moraju u cijelom toku takmičarske sezone igrati u Omladinskoj ligi BiH grupa „Sjever“, „Centar“, „Zapad“, „Jug“ ili Omladinskoj ligi BiH za juniore koju vodi NS/FS BiH.
- d. Selekcije pionira (U-15) i pretpionira (U-13) kluba člana m:tel Prve lige Federacije BiH za seniore, u toku cijele takmičarske sezone moraju igrati u omladinskim ligama kantonalnih/županijskih saveza.

- e. Nema obaveze da klub sa selekcijom početnika (U-11) učestvuje u službenim takmičenjima. Za takve timove treba organizovati prikladne mini turnire, omladinske susrete na lokalnom nivou i slično, kako bi se zabavili i imali šansu da stiču iskustva igrajući sa drugim timovima. Klubovi nisu obavezni registrirati igrače do 11 godina.
- f. Klub koji u toku takmičarske sezone sa nekom od omladinskih selekcija odustane od takmičenja ili shodno odredbama DP NS/FS BiH bude isključen iz takmičenja, snosit će disciplinske sankcije prema odredbama Disciplinskog pravilnika NS/FS BiH.
- g. Klubovi m:tel Prve lige Federacije BiH potrebno je da imaju školu nogometa za uzraste od 7-11 godina, u kojoj bi se djeca neprekidno nogometno educirala.
- h. Kantonalni/županijski savezi dužni su sva službena takmičenja u kojima učestvuju navedene kategorije administrativno voditi putem COMET informacionog sistema.
- i. Provjeru uvjeta iz ovog člana vrši Komisija za takmičenje NS Federacije BiH, o čemu obavještava Izvršni odbor NS FBiH.

---

## **V - ORGANIZACIJA TAKMIČENJA/NATJECANJA**

---

### **Član 6.**

- 6.01. Prvenstvena takmičenja provode se po dvostrukom bod-sistemu i vremenski utvrđenom kalendaru, sa dvije takmičarske polusezone, jesen i proljeće.
- 6.02. Kalendar i raspored takmičenja, na prijedlog Komisije za takmičenje NS FBiH, usvaja IO NS FBiH, najkasnije 30 (trideset) dana prije početka jesenjeg, odnosno proljetnog dijela prvenstva, a taj rok može biti pomjeren za 15 dana.
- 6.03. Raspored odigravanja prvenstvenih utakmica prvog dijela određuje se prije početka takmičarske godine žrijebom uz mogućnost primjene poludirigovanog načina žrijebanja samo za klubove iz istog mjesta gdje igraju svoje prvenstvene utakmice kao domaćini, s tim da ako su zainteresovani mogu podnijeti pismeni zahtjev Komisiji za takmičenje NS FBiH da im se omogući razdvajanje odigravanja prvenstvenih utakmica kao domaćina u odnosu na klub iz istog mjesta, i to najkasnije pet dana od određenog datuma provođenja žrijeba za raspored takmičenja za takmičarsku godinu.
- 6.04. Odluku o izmjenama kalendara takmičenja, u slučaju proglašenja vanrednog stanja ili stanja nesreće od strane nadležnih organa BiH ili Federacije BiH, donosi Komisija za takmičenje NS Federacije BiH.
- 6.05. Konačnu odluku o svim zahtjevima kao i modalitetu žrijebanja takmičarskih parova donosi Komisija za takmičenje NS FBiH, s tim da se mora voditi računa da se ne narušava interes i pravo ostalih klubova učesnika takmičenja. Odluka Komisije za takmičenje NS FBiH je konačna.
- 6.06. Komisija za takmičenje NS FBiH može odobriti da žrijebanje takmičarskih parova, umjesto predstavnika klubova vrši neka istaknuta nogometna osoba.
- 6.07. Raspored utakmica za prvenstvo m:tel Prve lige FBiH određuje se žrijebom takmičarskih brojeva klubova sudionika i primjenom „Bergerove tablice“.
- 6.08. Takmičenje m:tel Prve lige Federacije BiH se administrativno provodi kroz COMET informacioni sistem

**Član 7.**

- 7.01. Tri posljednja kola u takmičenju m:tel Prve lige Federacije BiH igraju se isti dan i u isto vrijeme, u skladu sa Kalendarom takmičenja. Izuzetno, ukoliko određena utakmica nema rezultatski značaj, te ishod iste ne utiče bitno na poredak na tabeli, Komisija za takmičenje NS FBiH može odobriti igranje iste u drugom terminu.

**Član 8.**

- 8.01. Utakmice se igraju u trajanju 2x45 minuta.  
8.02. Odmor između dva dijela igre traje minimalno 10, a maksimalno 15 minuta.

**Član 9.**

- 9.01. Nakon obavljenog žrijeba za raspored takmičenja za prvenstvo m:tel Prve lige Federacije BiH, klubovi učesnici takmičenja su obavezni u roku od 8 (osam) dana dostaviti u pismenoj formi Sekretarijatu za takmičenje NS FBiH slijedeće informacije:
- mjesto u kojem će kao domaćin igrati svoje prvenstvene utakmice
  - naziv stadiona (stalni i zamjenski)
  - vrijeme odigravanja utakmica (subota-nedjelja)
  - boju sportske opreme (majica, šorc, štucne) u kojoj će nastupati klub, kao i rezervnu boju sportske opreme
  - spisak registrovanih igrača, kao i službenih zvaničnika kluba koji će obavljati dužnosti na prvenstvenim utakmicama

---

**VI - PROMJENA TERMINA ODIGRAVANJA UTAKMICA**

---

**Član 10.**

- 10.01. Promjena termina odigravanja utakmice može se vršiti isključivo na osnovu podnesenog pismenog zahtjeva zainteresovanog kluba Komisiji za takmičenje NS FBiH, najkasnije osam (8) dana prije rasporedom utvrđenog termina odigravanja utakmice, a koji u sebi sadrži razlog zbog kojeg se traži promjena termina s priloženom dokumentacijom, iz koje se nesumnjivo može utvrditi opravdanost podnesenog zahtjeva.  
Pored navedenih razloga klub može dati i eventualni prijedlog novog termina, koji treba, ukoliko je moguće, biti usaglašen sa protivničkim klubom.
- 10.02. U slučaju kada zahtjev za promjenu termina (iz razloga više sile) nije podnesen shodno odredbi 10.01. ovog člana, odnosno najkasnije 3 (tri) dana prije utvrđenog termina za odigravanje utakmice ili je podnesen od strane gostujuće ekipe, kao i kada se za termin utakmice predlaže radni dan, podnosilac zahtjeva obavezan je dostaviti uz obrazloženje i pismenu saglasnost drugog kluba (protivnika) utakmice, za koju se traži promjena termina.
- 10.03. Odluku o zahtjevu kluba za promjenu termina utakmice iz odredbi 10.01. i 10.02. ovog člana donosi Komisija za takmičenje NS FBiH, s tim da se kod donošenja odluke moraju imati u vidu odredbe člana 16. Pravilnika o nogometnim takmičenjima NS/FS BiH.
- 10.04. Odluka Komisije za takmičenje NS FBiH o podnesenom pismenom zahtjevu za promjenu termina odigravanja utakmice je konačna i ona se dostavlja zainteresiranim klubovima i ostalim učesnicima takmičenja.
- 10.05. Izuzetno, Komisija za takmičenje NS FBiH u slučaju ukazane potrebe ili više sile može i u roku kraćem od tri dana donijeti odluku o promjeni termina utakmica.

- 10.06. Shodno potpisanom ugovoru sa kompanijom m:tel, sponzorom Prve lige FBiH, po zahtjevu TV kuće Arena Sport TV, Komisija za takmičenje NS FBiH će donijeti odluku o promjeni termina utakmice.

---

## **VII - ODLAGANJE UTAKMICE**

---

### **Član 11.**

- 11.01. Ako se odlukom nadležnog državnog organa (Vijeće ministara BiH, entitetske vlade ili lokalni organi uprave) proglasi Dan žalosti na području gdje se prema rasporedu takmičenja tog dana igraju utakmice m:tel Prve lige Federacije BiH, takmičarski organ koji rukovodi takmičenjem, može odrediti novi termin odigravanja utakmice, u skladu sa Kalendarom takmičenja, pri tome vodeći računa da se obezbijedi regularnost takmičenja.
- 11.02. U slučaju kada zbog Dana žalosti nije izvršeno odlaganje utakmice, obaveza je klubova da prije početka utakmice na terenu za igru odaju počast minutom šutnje ili na drugi prikladan način prema nastradalim zbog čega je proglašen Dan žalosti.
- 11.03. U slučaju kada je Dan žalosti proglašen od strane Vijeća ministara BiH, klub domaćin je obavezan da obezbijedi da na jarbolima stadiona zastave budu spuštene na pola koplja ili jarbola, a igrači na terenu za igru na rukavu dresa mogu nositi obilježje crne trake kao znak žalosti.
- 11.04. Klub domaćin obavezan je da putem razglasa zamoli sve učesnike utakmice da se suzdrže od bilo kakvih postupaka suprotno pijetetu zbog kojeg je proglašen dan žalosti.

### **Član 12.**

- 12.01. Ako se u toku trajanja utakmice, na osnovu javnog saopštenja od strane nadležnog organa iz prethodnog člana, proglasi Dan žalosti, utakmica se neće trajno prekinuti, ali je sudija utakmice dužan da u prvom privremenom prekidu igre zaustavi igru i zatraži od igrača na terenu da minutom šutnje izraze saučešće prema nastradalim ili umrlim osobama.

### **Član 13.**

- 13.01. Kada nadležni organ policije sa područja na kojem se trebaju odigrati rasporedom takmičenja prvenstvene utakmice, obavijesti Komisiju za takmičenje NS FBiH pismenim putem, da bi odigravanje utakmice prema utvrđenim terminima moglo imati ozbiljnih posljedica po bezbjedonosnu situaciju učesnika utakmice, Komisija za takmičenje NS FBiH obavezna je uzeti u razmatranje pismeni zahtjev policijskog organa za odlaganje utakmice, te donijeti odluku u vezi sa odlaganjem utakmice, vodeći računa da se zadovolje kriteriji bezbjedonosnog-sigurnosnog aspekta i zaštite regularnosti takmičenja.
- 13.02. Odlaganje utakmice može trajati najduže do deset dana u odnosu na rasporedom utvrđeni termin. Odluka Komisije za takmičenje NS FBiH je konačna i obavezujuća za sve učesnike utakmice.

### **Član 14.**

- 14.01. U slučaju proglašenja vanrednog stanja ili stanja nesreće od strane nadležnih organa BiH ili Federacije BiH, sve odluke vezane za takmičenje donosi Komisija za takmičenje NS FBiH odnosno Izvršni odbor Nogometnog saveza Federacije BiH u skladu sa Statutom Nogometnog saveza Federacije BiH i ostalim pravilnicima i odlukama.

## VIII - ODAVANJE POČASTI MINUTOM ŠUTNJE I IZNOŠENJE TRANSPARENATA HUMANITARNOG SADRŽAJA NA UTAKMICAMA

---

### **Član 15.**

- 15.01. Odavanje počasti (pijeteta) prema određenim kategorijama lica može se vršiti neposredno prije početka utakmice u objektu stadiona i to u slučajevima: iznenadne smrti (nesreće) igrača, sportskih radnika klubova i pripadnika navijačkih skupina, članova organa i tijela saveza, organa UEFA-e i FIFA-e, stradalih lica u elementarnim i drugim katastrofama, smrti državnih ili entitetskih istaknutih ličnosti, te ako je proglašen Dan žalosti.
- 15.02. Za svaku namjeru odavanja počasti minutom šutnje ili na drugi način, klubovi, organizacije i pojedinci moraju pismeno tražiti odobrenje od Komisije za takmičenje NS FBiH najkasnije 48 sati prije početka utakmice sa detaljnim obrazloženjem i protokolom aktivnosti.
- 15.03. O odluci Komisije za takmičenje NS FBiH podnosioci zahtjeva bit će upoznati najkasnije 8 (osam) sati prije početka utakmice, kao i sva službena lica utakmice (delegat, sudije utakmice), te klubovi.
- 15.04. U slučaju iznenadne smrti ili nesreće lica iz odredbe 15.01. ovog člana, odluku će donijeti delegat utakmice nakon konsultacija sa Sekretarijatom za takmičenje NS FBiH i predsjednikom Komisije za takmičenje NS FBiH.
- 15.05. Za slučajeve iznošenja (isticanja) transparenta čiji sadržaj ima humanitarni karakter: borba protiv rasizma, mržnje, nasilja na stadionima, nacionalizma, pomoći unesrećenim licima u elementarnim i drugim katastrofama, primjenjivat će se odredbe kao i za odavanje počasti.

---

## IX - DUŽNOSTI KLUBOVA

---

### **Član 16.**

- 16.01. Klub domaćin utakmice je obavezan pripremiti teren za igru, kao i sve ostale prostorije (svlačionice, kancelarije i sl.), da su čiste, zagrijane, sa toplom vodom, opremljene sa svim tehničkim pomagalicama najkasnije 90 (devedeset) minuta prije određenog termina za početak utakmice.
- 16.02. Za takmičarske utakmice klub-domaćin, odnosno organizator u m:tel Prvoj ligi FBiH obavezan je osigurati najmanje šest (6) sponzorskih „SELECT“ lopti, koje u svemu moraju odgovarati propisima Pravila nogometne igre. U slučaju da se utakmica igra po snijegu-odnosno da je teren pokriven snijegom, lopta mora biti crvene boje.
- 16.03. Utvrđivanje podobnosti terena za igru vrši sudija utakmice u prisustvu oba kapitena ekipa koje nastupaju na utakmici.
- 16.04. Odluku o podobnosti terena za odigravanje utakmice donosi isključivo sudija utakmice u skladu sa Pravilima nogometne igre.

### **Član 17.**

- 17.01. Klubovi su obavezni doći na stadion na kome će se odigrati utakmica najkasnije 90 (devedeset) minuta prije utvrđenog vremena za početak utakmice i nastupiti sa najboljim sastavom ekipa, te prisustvovati radnom sastanku (brifingu) kojim predsjedava delegat utakmice.



**Član 18.**

- 18.01. Klub domaćin obavezan je da delegatu utakmice stavi na raspolaganje ispravan računar sa priključkom na internet i printer. Klubovi su dužni da najkasnije 60 minuta prije početka utakmice, dostave delegatu na propisanom obrascu, spisak igrača i službenih lica koja će nastupati na utakmici i odgovarajuće akreditacije za iste. Sve osobe, igrači i službena lica sa dostavljenog propisanog obrasca za utakmicu, moraju biti licencirane/akreditovane od strane NS/FS BiH i NS FBiH i registrirane u COMET informacionom sistemu.
- 18.02. Spisak mora biti ovjeren i potpisan od zvaničnog predstavnika kluba. Spisak prijavljenih igrača mora sadržavati podatke igrača prijavljenih u COMET sistem. U slučaju da sistem COMET nije u funkciji vođenje zapisnika sa utakmice se radi ručno, a naknadno će delegat u sistemu COMET napraviti zapisnik.

**Član 19.**

- 19.01. Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti i zastava NS FBiH, Federacije BiH, klupske, zastave županija/kantona, te zastava fair playa. Istaknute zastave trebaju biti istih dimenzija, uredne i čiste.
- 19.02. Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 56. Disciplinskog pravilnika NS/FS BiH.

**Član 20.**

- 20.01. Svaki stadion mora imati sistem javnog razglasa, koji se može čuti sasvim razgovjetno i koji može nadjačati buku mase izvan stadiona.
- 20.02. Najavljivanje putem sistema javnog razglasa mora biti strogo neutralnog karaktera.
- 20.03. Sistem javnog razglasa ne smije se koristiti za političku propagandu, ne smije podržavati domaći tim niti smije sadržavati nijedan oblik diskriminacije gostujućeg tima.
- 20.04. Zabranjeno je korištenje od strane navijačkih skupina internog razglasa, megafona, sirena i drugih uređaja koji izazivaju buku, nadjačavaju službeni sistem javnog razglasa i ometaju samu utakmicu.

**Član 21.**

- 21.01. Klub domaćin je obavezan da poduzme sve mjere i radnje u cilju zaštite: članova gostujuće ekipe, sudaca, posmatrača suđenja, delegata utakmice, gostujućih navijača (kod organiziranog dolaska), neposredno prije početka utakmice, u toku, između dva poluvremena i po završetku utakmice, a sve do napuštanja stadiona za odigravanje utakmice, kao i poduzeti sve mjere na stadionu za odigravanje utakmice i oko njega, predviđene ovim Propozicijama takmičenja, Pravilnikom o bezbjednosti na utakmicama saveznog stepena takmičenja NS/FS BiH, kao i ostalim pravilnicima, odlukama, propisima i uputstvima NS/FS BiH i NS FBiH.
- 21.02. Klub domaćin utakmice obavezan je obezbijediti najmanje četiri (4) pripadnika profesionalne zaštitarske agencije, koji će se potpuno profesionalno starati za sigurnost svih aktera utakmice, te odgovarajuću dežurnu redarsku službu s propisno označenim dovoljnim brojem redara/zaštitara zaštitarske organizacije (kojih ne može biti manje od 6), pripadnike policije, liječnika i dežurno sanitetsko vozilo sa osobljem i nosilima, kao i najmanje osam (8) propisno označenih sakupljača lopti adekvatnog uzrasta, ravnomjerno i pravilno raspoređenih oko terena za igru, kao i zadužiti posebno lice za njihov rad.

- 21.03. Klub domaćin obavezan je podnijeti pismenu prijavu i tražiti odobrenje za održavanje javnog skupa utakmice nadležnoj policijskoj upravi Ministarstva unutrašnjih poslova, na čijoj teritoriji se treba odigrati utakmica, navodeći sve relevantne podatke, a posebno: mjesto i naziv stadiona, vrsta utakmice, imena klubova, datum i vrijeme odigravanja utakmice, kao i procjenu mogućeg broja gledalaca, kako domaćih, tako i gostujućih, ako su najavljeni, te podatke o angažovanim ostalim službama, redarska, ljekarska, sa orijentacionim brojem lica, te druga neophodna saznanja u vezi sa organizacijom utakmice.
- 21.04. Pismeni zahtjev za odobrenje odigravanja utakmice podnosi se najkasnije 72 sata prije određenog termina za odigravanje utakmice ili u rokovima kojima je regulisano ovo pitanje nadležnih organa bezbjednosti u mjestu odigravanja utakmice.
- 21.05. Pismeno odobrenje za odigravanje utakmice klub domaćin obavezno dostavlja na uvid delegatu utakmice prije njenog početka, odnosno na brifingu.
- 21.06. Bez pismenog odobrenja nadležne policijske stanice i prisustva pripadnika policije, dežurne ljekarske službe, sanitetskog vozila, sanitetskih nosila, zaštitarske i redarske službe utakmica se neće igrati. Odluku o neodigravanju utakmice donosi delegat utakmice i saopštava je sudiji utakmice i zvaničnim predstavnicima klubova, prije početka utakmice i sve to evidentira u izvještaju delegata utakmice i zapisniku sa utakmice.
- 21.07. Klub domaćin za neispunjavanje ovih obaveza snosi takmičarske i disciplinske posljedice u skladu sa Pravilnikom o nogometnim takmičenjima NS/FS BiH i Disciplinskim pravilnikom NS/FS BiH.
- 21.08. Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.
- 21.09. Promocija, objava ili isticanje na bilo koji način, političkih poruka ili bilo koji drugi vid političkog djelovanja unutar ili u neposrednoj blizini stadiona nije dozvoljeno prije početka utakmice, tokom utakmice i po završetku utakmice.
- 21.10. Na stadionima m:tel Prve lige FBiH nije dozvoljeno isticanje transparenta i obilježja neprimjerenog, uvredljivog i nepristojnog sadržaja što podliježe disciplinskoj odgovornosti.
- 21.11. Klubovi učesnici takmičenja dužni su ispoštovati eventualnu odluku nadležnog organa NS FBiH da se iz sigurnosnih razloga zabranjuje organizovani odlazak navijača na gostujuće utakmice njihovih klubova.
- 21.12. Na terenu za igru za vrijeme odigravanja utakmice zabranjen je bilo koji oblik reklamiranja.
- 21.13. Na mrežama, ugaonim zastavicama ili vratima ne može biti izvješten reklamni materijal ili pribor (npr. kamere, mikrofoni i megafoni i sl.). Također je zabranjena reprodukcija logotipa na travnatom dijelu terena za igru (korištenjem lasera i sl.).
- 21.14. Ukoliko se na stadionu za vrijeme odigravanja utakmice koristi sat koji pokazuje odigrano vrijeme utakmice, isti mora biti zaustavljen na kraju regularnog vremena igre svakog dijela igre, tj. nakon isteka 45. i 90. minuta igre.
- 21.15. Klubovi m:tel Prve lige FBiH obavezni su na stadion postaviti reklamne panoje i banere kompanije m:tel kako je to predviđeno potpisanim ugovorom. Kontrolu navedenog vrše delegati utakmica te dokaze o realizaciji dostavljaju u Sekretarijat NS FBiH.

**Član 22.**

- 22.01. Klub domaćin obavezan je neovisnoj snimateljskoj kompaniji, koju ovlasti NS FBiH, omogućiti adekvatne uvjete za snimanje utakmice.
- 22.02. Također, TV kompaniji koja vrši direktni prijenos utakmice, osigurati punu sigurnost za opremu i djelatnike prije, za vrijeme i nakon završetka utakmice, u objektu na stadionu.
- 22.03. Ukoliko se vrši TV prenos određene utakmice, trener je obavezan dati izjavu TV kompaniji koja vrši prenos, na mjestu koje je određeno od strane te kompanije. U suprotnom, klub i trener snose disciplinske sankcije.

**Član 23.**

- 23.01. Za vrijeme odigravanja prvenstvenih utakmica u stadionu, pored terena za igru, u tehničkom prostoru moraju se nalaziti lica akreditovana od strane NS FBiH ili NS/FS BiH i koja ispunjavaju kriterije u postupku licenciranja za takmičenje m:tel Prve lige Federacije BiH, i to:
1. Službeni predstavnik kluba,
  2. Glavni trener sa PRO ili A UEFA trenerskom licencom registriran u COMET informacioni sistem od strane Centra za edukaciju kadrova NS/FS BiH;
  3. Jedan ili dva pomoćna trenera sa PRO, A ili B UEFA trenerskom licencom registriran u COMET informacioni sistem od strane Centra za edukaciju kadrova NS/FS BiH;
  4. Igrači;
  5. Ljekar kluba na domaćim utakmicama;
  6. Fizioterapeut;
  7. Komesar za bezbjednost na domaćim utakmicama.
- 23.02. U pogledu odijevanja lica u tehničkom prostoru obavezno se primjenjuju slijedeći standardi:
1. Predstavnik kluba u odijelu (sa kravatom ili ne, uz istaknutu akreditaciju izdatu od NS FBiH)
  2. Komesar bezbjednosti u odijelu (sa kravatom ili ne, uz istaknutu akreditaciju izdatu od NS FBiH)
  3. Glavni trener u odijelu (sa kravatom ili ne), ili treneri kluba;
  4. Dva pomoćna trenera u treneri kluba
  5. Igrači u sportskoj opremi kluba sa markerima
  6. Ljekar kluba, odijelo ili u treneri kluba
  7. Fizioterapeut u treneri kluba
- 23.03. U slučaju nepoštivanja navedenih uslova klub snosi disciplinsku odgovornost.
- 23.04. Klubovi m:tel Prve lige Federacije BiH obavezni su imati minimalno jednog glavnog i jednog pomoćnog trenera u tehničkom prostoru sa odgovarajućom UEFA licencom.
- 23.05. Predstavnik kluba, glavni trener ili pomoćni trener ne mogu biti ista osoba.
- 23.06. Predstavnik kluba, komesar za bezbjednost, ljekar i fizioterapeut obavezni su posjedovati odgovarajuću takmičarsku akreditaciju koju izdaje NS FBiH.
- 23.07. Glavni treneri i treneri obavezni su posjedovati validnu UEFA licencu te ispuniti sve uslove za registraciju trenera u COMET informacioni sistemu.
- 23.08. Validnost izdatih potrebnih dokumenata mogu kontrolisati samo subjekti koji su ih i izdali, a delegat na utakmici utvrđuje njihovo posjedovanje, odnosno identitet lica.

- 23.09. Osobe sa spiska prijavljenih lica koje nemaju odgovarajuću akreditaciju, ne mogu se nalaziti u tehničkom prostoru, osim zamjenskih igrača.
- 23.10. Na klupi kluba m:tel Prve lige FBiH mogu sjediti glavni trener i treneri samo sa validnom UEFA licencom a koji su registrirani putem COMET informacionog sistema.
- 23.11. UEFA trenerske licence moraju biti validne da bi isti bili registrirani u COMET informacioni sistem za 2021. godinu (prvi dio sezone) a zatim i za 2022. godinu (drugi dio sezone) od strane Centra za edukaciju kadrova NS/FS BiH.
- 23.12. Takmičarske akreditacije službenog predstavnika, komesara bezbjednosti, ljekara i fizioterapeuta kluba m:tel Prve lige FBiH validne su ako su izdane od strane NS FBiH za takmičarsku 2021/2022 godinu.
- 23.13. Sva akreditirana/licencirana službena lica moraju biti unesena i evidentirana u COMET informacioni sistem sa adekvatnom fotografijom (treneri, predstavnici kluba, ljekari, fizioterapeuti i komesari za bezbjednost), od strane administracije NS FBiH odnosno Centra za edukaciju NS/FS BiH kada su u pitanju treneri.

#### **Član 24.**

- 24.01. Za vrijeme odigravanja utakmica bez prisustva gledalaca, pored osoba iz člana 21. i 22. ovih Propozicija, mogu biti prisutni članovi uprava klubova, (maksimalno 20 osoba po klubu uz dostavljeni spisak), akreditovani novinari i fotoreporter, osobe iz administracije kluba-domaćina prema spisku sa imenima.
- 24.02. Članovi uprava klubova i osobe iz administracije kluba-domaćina obavezni su boraviti u VIP loži.

---

### **X - NASTUPANJE NA UTAKMICI**

---

#### **Član 25.**

- 25.01. Klubovi su dužni nastupiti na svim utakmicama stalnog takmičenja koje su odlukama takmičarskog organa zakazane, predviđene ili odlukom sudije privremeno prekinute, bez obzira na okolnosti u kojima su se nalazili u vrijeme kada su obavješteni da nastupe, odnosno da nastave igranje utakmice.
- 25.02. Klub koji odbije da nastupi ili neodigra utakmicu iz odredbe 25.01. ovog člana, odgovoran je za učinjeni propust u takmičarskom i disciplinskom smislu.
- 25.03. Organ koji rukovodi takmičenjem, u svim navedenim slučajevima iz ovog člana, takve utakmice registrovati će po službenoj dužnosti 3:0 (par forfe) u korist protivnika i podnijeti zahtjev disciplinskom organu za utvrđivanje disciplinske odgovornosti.

---

### **XI - NAJMANJI BROJ IGRAČA U IGRI**

---

#### **Član 26.**

- 26.01. Utakmica ne može da počne po Pravilima nogometne igre ako jedna od ekipa nema najmanje sedam igrača na terenu za igru, od kojih je jedan vratar i kapiten.
- 26.02. Igrači, koji nisu upisani do početka utakmice u zapisnik sa utakmice, ne mogu nastupiti na utakmici.

26.03. Ako jedna ekipa za vrijeme igre ostane sa manje od sedam igrača, sudija je dužan da zaustavi igru, a ako u roku od pet minuta klub ne nastupi s minimalnim brojem igrača, sudija je dužan da označi kraj utakmice.

#### **Član 27.**

27.01. Svaka ekipa u zapisnik sa utakmice prijavljuje maksimalno 18 igrača. Klubovi koji nemaju najmanje 16 igrača u zapisniku sa utakmice snosit će disciplinske sankcije.

27.02. U igri učestvuje 11 prijavljenih igrača, a tokom igre mogu se izvršiti tri zamjene.

27.03. U slučaju donošenja odgovarajuće odluke od strane IFAB-a, svaka ekipa u zapisnik prijavljuje 20 igrača, a tokom igre se može izvršiti do pet zamjena tokom tri prekida na utakmici (izmjene koje se vrše prije početka drugog dijela igre – u poluvremenu – ne računaju se kao prekid).

#### **Član 28.**

28.01. Ekipe na jednoj utakmici ne mogu igrati u istim ili sličnim bojama dresova. Ekipe su dužne usaglasiti boje opreme 72 sata prije zvaničnog termina odigravanja utakmice, u skladu sa prijavljenim osnovnim bojama.

28.02. U protivnom, dresove će promijeniti domaća (prvoimenovana) ekipa. Ukoliko jedna od ekipa ne poštuje prijavljene boje dresova, ista snosi disciplinsku odgovornost.

---

## **XII - PRAVO NASTUPA IGRAČA**

---

#### **Član 29.**

29.01. Na prvenstvenim utakmicama mogu nastupiti igrači koji su stekli pravo igranja prema odredbama Pravilnika o registracijama klubova i igrača i statusu i transferu igrača NS/FS BiH, ukoliko su navršili 17 godina života, kao i igrači koji su navršili 16 godina ali sa obaveznim specijalističkim ljekarskim pregledom koji nadležni registracioni savez unosi u COMET informacioni sistem, na osnovu dokaza o obavljenom specijalističkom ljekarskom pregledu, dostavljenom od strane kluba, sa jasno naznačenim rokom trajanja istog, a kojim se proglašava sposobnim za nastupanje na utakmicama seniorskog uzrasta.

29.02. U sastavu prijavljene ekipe – zapisniku sa utakmice moraju se nalaziti najmanje četiri igrača mlađa od 21 godine života od kojih najmanje tri obavezno moraju početi utakmicu. Te igrače u toku prvog dijela igre mogu zamijeniti samo igrači koji su mlađi od 21 godine, što se ne odnosi na izmjenu golmana u slučaju povrede, a u suprotnom klub snosi takmičarske i disciplinske posljedice.

29.03. Ukoliko klub m:tel Prve lige FBiH u početnoj postavi ima više od tri igrača mlađa od 21 godine tog igrača može zamijeniti stariji igrač uz uvjet da u igri cijelim tokom prvog poluvremena moraju biti najmanje tri igrača mlađa od 21 godine.

29.04. Pravilo nastupa mlađih igrača od 21 godine odnosi se samo na igrače državljanke BiH.

29.05. Za takmičarsku 2021/2022 godinu, igrači mlađi od 21. godine života smatraju se igrači rođeni 01.01.2000. godine i mlađi.

29.06. Pravo nastupa igrača stranih državljanke regulisano je odredbama Pravilnika o registracijama klubova i igrača i statusu i transferu igrača NS/FS BiH. Klub može imati više registrovanih igrača stranih državljanke, s tim što 4 (četiri) igrača strana državljanke mogu biti upisani u zapisnik sa utakmice i imaju pravo nastupa na jednoj utakmici. U suprotnom, klub snosi takmičarske i disciplinske posljedice.

- 29.07. Shodno odredbama Pravilnika o registracijama klubova i igrača i statusu i transferu igrača NS/FS BiH, u toku takmičarske sezone klub može po osnovu ustupanja registrirati najviše četiri igrača, s tim što najviše tri mogu nastupiti na jednoj utakmici. U suprotnom, klub snosi takmičarske i disciplinske posljedice.
- 29.08. Igrač strani državljanin kojem istekne boravišna dozvola nema pravo nastupa, a ako nastupi takav igrač, klub snosi takmičarske i disciplinske posljedice.
- 29.09. Igrači sa dvojnim državljanstvom ne smatraju se stranim državljanima.
- 29.10. Igrač koji je registrovan za veliki nogomet i futsal može nastupiti isti dan na dvije utakmice i to isključivo jednu u futsalu i jednu u velikom nogometu.
- 29.11. Igrač koji je upisan u zapisnik utakmice, smatra se da na utakmici nije nastupio ukoliko nije ušao u igru.
- 29.12. Igrač koji nije unesen u COMET sistem ne može nastupiti za svoju ekipu na utakmici.
- 29.13. Ukoliko oba kluba naprave prekršaj iz gore navedenih stavova, a za koji se snose takmičarske posljedice, takva utakmica će biti registrovana kao odigrana, ali se neće uzeti u obzir ostvareni rezultat na istoj.

---

### **XIII - IDENTITET IGRAČA**

---

#### **Član 30.**

- 30.01. Na prvenstvenim utakmicama mogu nastupiti samo igrači čiji je identitet utvrđen putem fotografije iz COMET informacionog sistema, a u slučaju njenog nedostatka identitet će se utvrditi na osnovu javne isprave: lične karte ili pasoša, odnosno štampane ID COMET kartice. Igraču sa neadekvatnom pohranjenom fotografijom u COMET informacionom sistemu (kada je nemoguće utvrditi identitet), delegat utakmice neće dozvoliti nastup na utakmici.
- 30.02. Identitet se u pravilu utvrđuje prije početka utakmice.
- 30.03. Za igrače koji su zakasnili na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

---

### **XIV - LJEKARSKI PREGLED I ČLANARINA**

---

#### **Član 31.**

- 31.01. Svaki igrač koji nastupa u takmičenju mora u COMET informacioni sistem imati unesen period važenja ljekarskog pregleda i period za koji je uplaćena članarina. Obavljeni ljekarski pregled mora sadržavati obavezujuće elemente koje je propisala Komisija za sportsku medicinu NS FBiH.
- 31.02. Rok važnosti ljekarskog pregleda za igrače koji na dan izvršenog pregleda ima najmanje 17 (sedamnaest) i više godina života traje 6 (šest) mjeseci, a za mlađe igrače 4 (četiri) mjeseca.
- 31.03. Za igrača koji nema upisan važeći ljekarski pregled u COMET informacioni sistem ili važeću potvrdu, delegat utakmice neće dozvoliti nastup na utakmici.

- 31.04. Za sva ostala pitanja u vezi sa ljekarskim pregledom igrača primjenjivat će se odredbe člana 56. Pravilnika o nogometnim/fudbalskim takmičenjima NS/FS BiH.

---

## **XV – PREDSTAVNIK BEZBJEDNOSTI**

---

### **Član 32.**

- 32.01. Na utakmicama na kojima je potrebno prisustvo predstavnika bezbjednosti, istog određuje Komisija za bezbjednost NS FBiH, a nakon obavljenih konsultacija sa Komisijom za takmičenje NS FBiH i Sekretarijatom NS FBiH.
- 32.02. Uloga i obaveze predstavnika bezbjednosti definisane su Uputstvom koje donosi Komisija za bezbjednost NS FBiH.
- 32.03. Troškove predstavnika bezbjednosti na utakmicama m:tel Prve lige FBiH snosi Nogometni savez Federacije BiH u skladu sa Pravilnikom o dnevnicama, putnim troškovima, taksama, članarinama i drugim naknadama NS FBiH.

---

## **XVI - DELEGAT NA UTAKMICI**

---

### **Član 33.**

- 33.01. Delegata na utakmici određuje Komisija za takmičenje NS FBiH, sa usvojene liste delegata za sezonu 2021/2022.
- 33.02. Ukoliko na utakmicu ne dođe delegirani delegat, njegovu dužnost preuzima posmatrač suđenja na toj utakmici.
- 33.03. Delegat zastupa Komisiju za takmičenje NS FBiH i ima vrhovni nadzor na utakmici.
- 33.04. Komisija za takmičenje NS FBiH donosi posebno Uputstvo o vršenju dužnosti delegata.
- 33.05. Delegat i sudije su obavezni dostaviti dopunski izvještaj u roku od 24 sata po odigravanju utakmice, ukoliko je na utakmici došlo do incidenata, prekida utakmice kao i na zahtjev Komisije za takmičenje NS FBiH.

### **Član 34.**

- 34.01. Delegat je obavezan da 90 minuta prije početka utakmice održi radni sastanak (brifing) sa predstavnicima klubova, sudijama utakmice, posmatračem suđenja, komesarom za bezbjednost kluba domaćina i predstavnikom policije.  
Kašnjenje na radni sastanak – brifing povlači disciplinsku odgovornost.

---

## **XVII - POSMATRAČ SUĐENJA**

---

### **Član 35.**

- 35.01. Posmatrača suđenja određuje Komisija za suce i suđenje NS FBiH, sa liste posmatrača suđenja za sezonu 2021/2022.
- 35.02. Uloga i obaveze posmatrača suđenja su definisane Uputstvom koje donosi Komisija za suce i suđenje NS FBiH.

---

## XVIII - SUCI

---

### **Član 36.**

- 36.01. Utakmice m:tel Prve lige Federacije BiH mogu voditi samo sudije sa liste sudaca m:tel Prve lige FBiH sa ispitom saveznog nogometnog suca, čije određivanje vrši Komisija za suce i suđenje NS FBiH, u skladu sa odlukom Izvršnog odbora NS FBiH. Utakmice m:tel Prve lige Federacije BiH, na zahtjev Komisije za suce i suđenje NS FBiH, mogu suditi i suci sa liste m:tel Premijer lige BiH.
- 36.02. Izuzetno, sudije sa liste neposredno nižeg stepena takmičenja (Druga liga FBiH) koji se nalaze u talent i mentor programu, mogu suditi utakmice m:tel Prve lige FBiH sa zvanjem Saveznog suca.
- 36.03. Na utakmicama m:tel Prve lige FBiH mogu se odrediti dodatni 5-ti i 6-ti sudac.

### **Član 37.**

- 37.01. Sudija utakmice je dužan da prije početka utakmice pregleda i odluči da li je teren podoban za igru.
- 37.02. Ako sudija utvrdi u prisustvu dva kapitena ekipa da je teren nepodoban za igru, utakmica se neće igrati, a sudija će sačiniti poseban izvještaj o nepodobnosti terena za igru.
- 37.03. Sudija je dužan da nakon utakmice u svom izvještaju navede podatke koje se odnose na postignute pogotke, zamijenjene, opomenute i isključene igrače, a prema potrebi i druge podatke, ako se radi o prekidu utakmice, neredu, tuči, uključujući eventualne prijave i sl.

### **Član 38.**

- 38.01. Za utakmice m:tel Prve lige Federacije BiH može biti određen i supervizor, a određuje ga predsjednik NS FBiH u saradnji sa dopredsjednikom NS FBiH.

---

## XIX - ZAPISNIK SA UTAKMICE

---

### **Član 39.**

- 39.01. Delegat sastavlja zapisnik sa utakmice. Zapisnik sa utakmice se popunjava elektronski, u COMET sistemu. Klubovi su dužni prije početka utakmice dostaviti ovjeren i potpisan spisak igrača i službenika svoje ekipe na propisanom obrascu.
- 39.02. Po završetku utakmice zapisnik sa utakmice sastavljen putem COMET sistema, sravnjavaju delegat i sudija, nakon čega delegat zaključi izvještaj fair playa, a sudija utakmice svojom šifrom zaključuje zapisnik sa odigrane utakmice.

---

## XX - REGISTRACIJA UTAKMICA

---

### **Član 40.**

- 40.01. Ako na utakmicu nije uložena žalba, a ne postoje uslovi za registraciju po službenoj dužnosti, utakmicu Komisija za takmičenje NS FBiH registruje postignutim rezultatom.



- 40.02. Ako je prvostepena odluka pravosnažna, ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim takmičenjima NS/FS BiH.
- 40.03. Komisija za takmičenje NS FBiH vrši analizu i registraciju odigranih utakmica na prvom narednom sastanku.
- 40.04. Izuzetno, Komisija za takmičenje NS FBiH registraciju odigranih utakmica može izvršiti putem e-maila, telefona ili faksa. Verifikaciju registrovanih utakmica vrši Komisija za takmičenje NS FBiH na prvoj narednoj sjednici.
- 40.05. Ako je na utakmicu uložena žalba, rok za registraciju utakmice se produžava do konačne odluke.

---

## **XXI - ŽALBE**

---

### **Član 41.**

- 41.01. Žalbe se po svim osnovama moraju najaviti 24 sata nakon odigrane utakmice elektronskim putem, telegramski, e-mailom ili faxom koji ima automatski ispis datuma i vremena o najavi žalbe.
- 41.02. Žalba sa pismenim obrazloženjem sa dokazom o uplaćenju taksu mora se dostaviti u NS Federacije BiH u roku od 48 sati po odigranoj utakmici.
- 41.03. Ukoliko rok za ulaganje žalbe ili najava žalbe ističe u nedjelju ili na državni praznik, rok za ulaganje žalbe se produžava za prvi naredni radni dan.
- 41.04. Žalba se dostavlja putem Sekretarijata NS FBiH, Komisiji za takmičenje NS FBiH.
- 41.05. Uz žalbu se dostavlja dokaz o uplaćenju taksu u skladu sa odlukom IO NS FBiH.

### **Član 42.**

- 42.01. Nenajavljene, neblagovremene i žalbe koje nisu uredno taksirane neće biti uzete u razmatranje, već će biti odbačene, a utakmica će se registrovati postignutim rezultatom.
- 42.02. Odluke po uložnim žalbama će biti donijete u roku od osam dana od dana prijema žalbe.
- 42.03. Pri ocjeni pravovremenosti i validnosti najave žalbe i žalbe uzima se u obzir datum poslanog e-maila, poštanski žig preporučene pisma ili telegrama, datum na faksu kao potvrdu o žalbi te datum na novčanoj uplatnici.

### **Član 43.**

- 43.01. Žalbe u prvom stepenu rješava Komisija za takmičenje NS FBiH.

### **Član 44.**

- 44.01. Žalba na prvostepenu odluku može se podnijeti Apelacionoj komisiji NS FBiH, u roku od osam (8) dana od dana prijema odluke prvostepenog organa. Drugostepena odluka je konačna i biće dostavljena Komisiji za takmičenje NS FBiH na realizaciju.

### **Član 45.**

- 45.01. Organ koji donosi odluke može utvrditi i skraćeni žalbeni postupak.

---

## XXII - DISCIPLINSKE SANKCIJE

---

### **Član 46.**

46.01. O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH i odluke Izvršnog odbora NS FBiH broj 1463/21 od 07.07.2021. godine.

---

## XXIII - UTVRĐIVANJE PLASMANA

---

### **Član 47.**

47.01. Plasman klubova na tabeli utvrđuje se prema odredbama člana 43. Pravilnika o nogometnim/fudbalskim takmičenjima NS/FS BiH.

47.02. Shodno odlukama IFAB-a gol u gostima se ne računa dvostruko;

47.03. Prvak m:tel Prve lige Federacije BiH na kraju takmičarske sezone 2021/2022 prelazi u viši rang- m:tel Premijer ligu BiH.

---

## XXIV - POPUNJAVANJE LIGE

---

### **Član 48.**

48.01. m:tel Prvu ligu Federacije BiH u takmičarskoj sezoni 2022/2023 popunjavaju dva kluba Druge lige FBiH „Sjever“, „Centar“, „Zapad“ i „Jug“ koji će se dobiti nakon odigranog doigravanja prvoplasiranih timova Druge lige FBiH, koji istovremeno moraju ispunjavati i sve ostale uvjete propisane Propozicijama takmičenja, Pravilnikom o licenciranju klubova za učešće u takmičenju m:tel Prve lige NS FBiH i drugim odlukama Izvršnog odbora NS FBiH.

48.02. Izuzetno, u doigravanje za ulazak u m:tel Prvu ligu FBiH plasman može ostvariti i sljedeći klub prema plasmanu iz Druge lige Federacije BiH koji je dobio licencu za igranje u m:tel Prvoj ligi FBiH i to samo ako klub prvak Druge lige FBiH nije dobio licencu za takmičenje u m:tel Prvoj ligi FBiH.

48.03. m:tel Prvu ligu Federacije BiH u takmičarskoj sezoni 2022/2023 popunjavaju klubovi iz NS FBiH koji po osnovu plasmana iz prethodne sezone napuštaju m:tel Premijer ligu BiH, ako ispunjavaju uslove u postupku licenciranja klubova za takmičenje u m:tel Prvoj ligi FBiH.

48.04. Na kraju takmičarske sezone 2021/2022, m:tel Prvu ligu Federacije BiH napustit će onoliko klubova koliko je potrebno da bi se m:tel Prva liga FBiH popunila klubovima koji ispadaju iz takmičenja m:tel Premijer lige i klubovima pobjednicima doigravanja za ulazak u m:tel Prvu ligu FBiH, a da bi m:tel Prva liga FBiH u takmičarskoj sezoni 2022/2023 brojala 16 klubova.

48.05. Ukoliko neki od klubova koji je rezultatski obezbijedio učešće u takmičenju m:tel Prve lige FBiH za sezonu 2022/2023 ne dobije licencu za učešće u takmičenju m:tel Prve lige FBiH za sezonu 2022/2023 status prvoligaša zadržava prvi naredni klub koji nije rezultatski ostvario plasman u m:tel Prvoj ligi FBiH a koji je dobio licencu za takmičarsku sezonu 2022/2023.

- 48.06 Izuzetno, m:tel Prvu ligu Federacije BiH može popuniti i poraženi klub/klubovi iz baraža za ulazak u m:tel Prvu ligu FBiH koji je ostvario bolji rezultat i to samo ako se ukaže mjesto za popunu m:tel Prve lige FBiH do broja 16.  
Također izuzetno, m:tel Prvu ligu Federacije BiH može popuniti i prvi naredni klub Druge lige FBiH prema plasmanu a koji je dobio licencu, ako se ukaže mjesto za popunu m:tel Prve lige FBiH do broja 16 i to samo iz one grupe u koju ispada klub m:tel Prve lige FBiH koji nije dobio licencu.
- 48.07. Pri ocjeni bolje ostvarenog rezultata poraženih klubova u obzir se uzima gol razlika. Ukoliko je gol razlika identična u obzir se uzima broj datih i primljenih pogodaka. Ukoliko je i broj datih i primljenih golova identičan u obzir se uzima fair-play tabela, s tim što žuti karton donosi jedan negativan broj, a crveni karton dva negativna boda. Ukoliko je sve identično, plasman u m:tel Prvu ligu FBiH će se odlučiti žrijebom.
- 48.08. Način doigravanja za ulazak u m:tel Prvu ligu Federacije BiH propisani su Propozicijama takmičenja Druge lige FBiH.
- 48.09. Uslovi za prijem u takmičenje m:tel Prve lige Federacije BiH propisani su Pravilnikom o licenciranju klubova NS FBiH.

---

## **XXV - FINANSIJSKE ODREDBE**

---

### **Član 49.**

- 49.01 Prihodi sa prvenstvenih utakmica pripadaju klubu domaćinu.

### **Član 50.**

- 50.01. Službenim licima na utakmici pripada odgovarajuća naknada, koja uključuje taksu, dnevnicu i putne troškove, u skladu sa Pravilnikom o dnevnicama, putnim troškovima, taksama, članarinama i drugim naknadama NS FBiH.
- 50.02. Sve isplate vrše se poslije odigravanja utakmica, najkasnije 24 sata po odigranoj utakmici, obavezno na žiro račune službenih osoba.
- 50.03. Ukoliko klub ne isplati službena lica ili ih djelomično isplati, klubu se ostavlja dodatni rok od 24 sata da izmiri troškove, nakon čega nastupa suspenzija do izmirenja obaveza u cijelosti, te klub podliježe novčanoj kazni za neizvršavanje obaveza.
- 50.04. Klub je dužan validan dokaz o isplati naknada za službena lica, dostaviti delegatu na brifingu prije početka prve naredne utakmice.
- 50.05. Delegat je dužan na brifingu, sat i pol prije početka utakmice, izvršiti provjeru da li je klub isplatio pripadajuće naknade svakom službenom licu pojedinačno što se odnosi na prethodnu utakmicu.

### **Član 51.**

- 51.01. Izvršni odbor NS Federacije BiH prije početka prvenstva donosi odluku o visini troškova takmičenja. Kotizacija za takmičenje se utvrđuje za cijelu takmičarsku sezonu uz mogućnost da klubovi uplatu izvrše u dvije rate, svaku prije početka takmičarske polusezone.
- 51.02. Ukoliko klub odustane od takmičenja u toku takmičarske sezone, obavezan je izvršiti uplatu kotizacije za takmičenje u cijelosti.

- 51.03. Neizvršenje obaveza povlači disciplinske posljedice u skladu sa odredbama Disciplinskog pravilnika NS/FS BiH.

---

## **XXVI - NAGRADE**

---

### **Član 52.**

- 52.01. Nogometni savez Federacije BiH prvoplasiranoj ekipi m:tel Prve lige FBiH dodjeljuje pehar u trajno vlasništvo.
- 52.02. Igračima, tehničkom i stručnom rukovodstvu prvoplasiranog kluba dodjeljuje se 35 medalja.

---

## **XXVII - ZAVRŠNE ODREDBE**

---

### **Član 53.**

- 53.01. Za sve što nije predviđeno ovim Propozicijama, važe odredbe Pravilnika o nogometnim takmičenjima NS/FS BiH, Pravila nogometne igre i drugih propisa NS FBiH, NS/FS BiH, FIFA-e i UEFA-e.
- 53.02. Za utakmice m:tel Prve lige FBiH primjenjivat će se Plan mjera i procedura COVID-19 u skladu sa trenutnom epidemiološkom situacijom i odlukama nadležnih organa Federacije BiH i odlukama IO NS FBiH.

### **Član 54.**

- 54.01. Propozicije stupaju na snagu danom objavljivanja na web stranici Saveza, a primjenjuju se za takmičarsku sezonu 2021/2022.

**P R E D S J E D N I K**

**Dragan Soldo**

**NOGOMETNI SAVEZ FEDERACIJE BiH**

**KLUBOVIMA PRVE LIGE FEDERACIJE BiH**

*(Aneks Propozicija takmičenja za takmičarsku 2021/2022)*

**ANEKS – MINIMUM MEDICINSKIH ZAHTJEVA ZA TRETMAN IGRAČA, STRUČNOG ŠTABA TIMA I SUDIJSKOG TIMA**

Ovaj dokument detaljno specificira minimum medicinskih zahtjeva za takmičenje u m:tel Prvoj ligi Federacije BiH u smislu usluga koje treba osigurati klub domaćin za tretman igrača, stručnog štaba tima i sudijskog tima. Konkretni zahtjevi za svako takmičenje specificirani su u svakom odjeljku.

**1. Ambulatna kola**

Obavezni zahtjevi važe za:

- a) dan igranja utakmice na stadionu odigravanja utakmice m:tel Prve lige FBiH

U takmičenju m:tel Prve lige FBiH klub domaćin je odgovoran za obezbjeđenje ambulantnih kola ALS (za naprednu podršku kod životne ugroženosti) s najmanje jednim članom paramedicinskog osoblja smještenih na pogodnom mjestu kako bi se omogućila hitna medicinska evakuacija s terena bez odlaganja.

Kada su ambulatna kola potrebna na stadionu, savjetuje se ukoliko se ne mogu obezbjediti ambulatna kola javnog zdravstvenog servisa da se koriste privatna ambulantna kola, da bi se osiguralo prisustvo ambulantnih kola na stadionu za potrebni period (3 sata).

Obavezni	Preporučeni
<p>1 x kompletno opremljena ambulantna kola ALS:</p> <ul style="list-style-type: none"> <li>• koja bi se koristila samo za tretman igrača, stručnog štaba tima, sudijskog tima i oficire utakmice</li> <li>• koja bi bila prisutna 30 minuta prije početka utakmice, za vrijeme trajanja utakmice i do 30 minuta nakon utakmice (ukupno 3 sata)</li> <li>• lokaciju treba potvrditi ljekarima tima pri dolasku na stadion</li> <li>• da sadrže kompletno opremljenu torbu za hitnu pomoć i AED defibrilator</li> <li>• da se nalaze u području stadiona s kojeg je omogućen najbolji brzi izlazak s područja terena/svlačionica za hitnu medicinsku evakuaciju</li> <li>• da imaju najmanje jednog člana paramedicinskog osoblja</li> </ul>	

## 2. Ljekarsko osoblje

Obavezni zahtjevi važe za:

a) dan igranja utakmice u m:tel Prvoj ligi FBiH

Klub domaćin odgovoran je za obezbjeđenje jednog ljekara obučenog za hitnu medicinsku pomoć koji će biti prisutan uz ivicu terena najmanje od trenutka dolaska timova na stadion i do njihovog odlaska. Tu ulogu može vršiti ljekar domaćeg tima, pod uslovom:

- da je ljekar tima obučen i kvalifikovan za hitnu prvu ljekarsku pomoć i tehnike pružanja pomoći;
- da je imenovan neki drugi dužnosnik iz kluba domaćina za olakšavanje hitne medicinske evakuacije sa stadiona bez odlaganja.

Obavezni	Preporučeni
<p>1 x ljekar za hitnu medicinsku pomoć uz teren za igru:</p> <ul style="list-style-type: none"> <li>• Vršiti ulogu medicinskog koordinatora za stadion izuzev ako je obezbijeđen i specifični medicinski koordinator.</li> <li>• Odgovoran za osiguranje potrebne medicinske opreme uz ivicu terena specificirane u poglavlju 1.</li> <li>• Odgovoran samo za tretman igrača, stručnog štaba tima, sudijskog tima i oficira utakmice.</li> </ul>	
<p>1 x ekipa za nosila (s nosilima od lesonita i najmanje dva obučena nosača (kvalifikacija u pružanju prve pomoći/iskustvo u nošenju pacijenata na nosilima)).</p>	

## 3. Posebna napomena

U cilju suzbijanja COVID-19, a u zavisnosti od epidemioloških mjera, svi klubovi m:tel Prve lige Federacije BiH obavezni su prije odigravanja svake utakmice obezbijediti:

- Plan organizacije utakmice sa aspekta epidemiološke-zdravstvene zaštite učesnika;
- Osigurati sanitarno-epidemiološke uslove u službenim prostorijama i svlačionicama (sanitarna sredstva, dezinfekcioni materijal itd)
- Osigurati medicinsku opremu u svrhu zaštite od virusa COVID-19 (sanitarne rukavice, zaštitne maske, bezkontaktne toplomjere i sl.)
- Sve osobe koje ne učestvuju u igri na terenu obavezni su nositi sanitarne rukavice i zaštitne maske te poštivati minimalan razmak (1,5 metara) između osoba.

**P R E D S J E D N I K**  
**KOMISIJE ZA SPORTSKU MEDICINU**  
**Ćuturić Mladen vr.**

Broj: 454/20  
Sarajevo: 26.06.2020.

**KOMISIJA ZA SPORTSKU MEDICINU NS FBiH**

Na osnovu člana 21. Pravilnika o radu Komisija Izvršnog odbora i pravnih tijela Nogometnog saveza Federacije Bosne i Hercegovine, Komisija za sportsku medicinu NS FBiH donosi s l j e d e ć u

**O D L U K U**  
**o obavezujućim elementima za ljekarski pregled igrača**

**Član 1.**

Ljekarski pregled igrača mora sadržavati sljedeće minimalne obavezujuće elemente:

- a) Internistički pregled ili pedijatrijski pregled (za igrače do 16 godina), koji obavezno treba sadržavati: EKG analizu u skladu sa UEFA propisima i osnovnu laboratorijsku obradu,
- b) Oftalmološki pregled,
- c) Stomatološki pregled,
- d) Ostale testove i analize prema indikaciji.

**Član 2.**

Ova Odluka stupa na snagu danom objavljivanja u Službenom glasniku NS FBiH.

**O b r a z l o ž e n j e**

Komisija za sportsku medicinu NS FBiH je razmatrao odredbe poglavlja XIV Propozicija takmičenja Prve lige Federacije BiH (Ljekarski pregled i članarina)-

Istim poglavljem predviđa se obaveza da svaki igrač, koji nastupa u nekom od prednje navedenih takmičenja, obavezno mora imati upisan nalaz o izvršenom ljekarskom pregledu koji sadrži ocjenu o zdravstvenoj sposobnosti u COMET informacionom sistemu.

Član 31.02. Propozicija takmičenja predviđa i spisak obavezujućih elemenata a za čije donošenje propisuje nadležnost Komisije za sportsku medicinu NS FBiH.

Shodno prednje navedenom, a kako bi se u u potpunosti ispoštovala odredba ovog člana, te precizirala i pojednostavila njegova primjena u praksi, Komisija za sportsku medicinu NS FBiH donijela je odluku kao u dispozitivu.

**P R E D S J E D N I K**  
**KOMISIJE ZA SPORTSKU MEDICINU**

**Ćuturić Mladen vr.**